

ծանր պարտեօք, և միաբանք նորին կապեալ յաղքատութեան որպէս յերկաթս: Լուեալ գլխաւորաց ազգին զայս ամենայն բանս գանկատանաց զԳալուստ վարդապետէ, ընկեցին զնա յիշխանութենէ Պատրիարքութեան, և ընտրեցին 'ի տեղի նորա զՄինաս վարդապետ Ամթեցի, միաբան Ս. Երուսաղէմի. եւ սպա ելեալ զնացին բազմութեամբ առ դատաւորն Կոստանդինուպօլսոյ, եւ մատուցեալ գիր ամբաստանութեան, պատմեցին զգործս մնասապարտ Գալուստ վարդապետի, զմերժումն նորա, եւ զընտրութիւն Մինասոյ. ապա խնդրեցին տալ ածել ըզ-Գալուստ 'ի Կոստանդինուպօլիս, զի քննեցին հաշիւք նորին: Եւ դատաւորն գրեալ յայտ արար 'ի Գուռն զամենայն բանս Հայոց, և զգիրս գանկատանաց ժողովրդոցն, և զըջիլ Գալուստ վարդապետի ելուդակարար եւ զվրդովել նորա զխաղաղութիւն ժողովրդոց, զըողք դատաւորին Երուսաղէմի, զընտրութիւն նորոյ Պատրիարքի հաւանութեամբ ազգին, և հաստատել յիշխանութեան Երուսաղէմի զՄինաս վարդապետ: Եւ հրաման յԱրքայէ, զի ուր եւ գտցի Գալուստ վարդապետ, ածցի 'ի Գուռն: Եւ ապա գրեցաւ հրովարտակ կայսերական (Սաթթի Շէրիֆ) 1110 (1699), և հաստատեցաւ Պատրիարքութիւնն Երուսաղէմի 'ի վերայ Մինաս վարդապետի:

Այլ Գալուստ վարդապետ լուեալ զանցս Կոստանդինուպօլսոյ, թագոյց զանձն իւր եւ զերծեալ 'ի ձեռաց խնդրակաց իւրոց, եհաս 'ի Թագաւորեալ քաղաք անդր. և սկսաւ արկանել զաղմուկ խռովութեան 'ի մէջ ժողովրդոց, և չարախօս լինել զՄինաս վարդապետէ. եւ սակս հասուցանելոյ նմա չարիս՝ ձեռնամուխ լինէր 'ի գործս նորա. և շրջեալ այսր անդր բամբասէր զնա, թէ սուտակասպաս բանիւք պատրեաց զժողովուրդն, և նոքօք եհան զԱրքայ 'ի կամաց իւրոց. և յանիրաւի յափշտակեաց յինէն զիշխանութիւն Պատրիարքութեան, եւ այլ սոցին նման բանիւք ջանայր հանել զնա յաջաց:

Տեսեալ Մինաս վարդապետի թէ չիք խաղաղութիւն յերեսաց չարախօսութեանց Գալուստ վարդապետի. եւ դժուարին է նմա յանդորրու վարել զիշխանութիւն իւր, յուղի անկեալ չոքաւ 'ի Կոստանդինուպօլիս. և իբրեւ ոչ